



SVEČANO OTVORENA ŠKOLA U PRIRODI



Ove godine svečano je otvorena "Škola u prirodi" u Šabićima uz prisustvo brojnih političkih, kulturnih i javnih zvaničnika.

Uručena su priznanja najzaslužnijim kolektivima i pojedincima za pomoć u realizaciji ovog projekta.

Za dosadašnji rad od posjetilaca "Škole u prirodi" stižu samo riječi hvale.

RAZVOJ POLJOPRIVREDE U OPĆINI

Strana 3.

OBILJEŽAVANJE DANA OPĆINE TRNOVO

Strana 2.

DODJELA JAVNIH PRIZNANJA I NAGRADA

Općinsko vijeće Trnovo na 41. Sjednici održanoj dana 19.07.2004.godine donijelo je Odluku o dodjeli javnih priznanja i nagrada Općine Trnovo.

Javna priznanja i nagrade u 2004.godini dodijeljena su sljedećim pojedincima i kolektivima:

Kolektivna plaketa Općine Trnovo dodjeljuje se Fondaciji "OdRaz".

Pojedinačna plaketa Općine Trnovo dodjeljuje se Šarić Medarisu, Berilo Ibru i svim poginulim pripadnicima oružanih snaga BiH koji su imali prijavljeno prebivalište ili boravište na području Općine Trnovo 1991/92.

PROJEKTI U 2004.GODINI

Izdvojena značajna sredstva za asfaltiranje putnih pravaca Šabići - Bijele vode i Grkarica - Pendičići. Sredstvima koja su obezbjeđena od strane Kantonalne direkcije za ceste postavljen je asfalt na oba putna pravca u dužini od po 1500 m.

Opširno na strani 6.

VAŠA PRAVA

Od 01.08.2004.godine u općini će biti uspostavljena mreža besplatne pravne pomoći. Udruženje Vaša prava će raditi i pružati besplatnu pravnu pomoć svaki drugi utorak u mjesecu od 11:30 do 13:00 časova u sali Općine Trnovo.

Ako imate problema sa:

- pravom na imovinu,
- radnim pravom,
- zdravstvenom zaštitom i
- Drugim javnim uslugama

Uspostavljeni centar informativne i pravne pomoći pružit će Vam usmeni i pismeni pravni savjet iz različitih oblasti prava.

POTPISANI UGOVORI SA 11 INVESTITORA

Strana 4. I 5.





DAN OPĆINE TRNOVO

I ove godine nizom manifestacija Općina Trnovo obilježit će svoj praznik - 31. juli, Dan Općine Trnovo.

Povodom dana općine, održat će se svečana sjednica Općinskog vijeća Trnovo na kojoj će govoriti Predsjedavajući općinskog vijeća Ismet Imamović i Općinski načelnik Ibro Berilo, a biće dodijeljena javna priznanja i nagrade pojedincima i kolektivima.

Prije svečane sjednice delegacija općine će položiti cvijeće na više spomen obilježja poginulim sugrađanima, braniteljima BiH.

U toku mjeseca jula 2004.godine izvedena su brojna kulturna i sportska takmičenja.



PROGRAM OBILJEŽAVANJA DANA OPĆINE TRNOVO 31. JULI 2004.GODINE

SPORTSKE AKTIVNOSTI:

- Turnir u malom nogometu i atletika na Dujmovićkim barama, nedjelja, 25.07.2004.g. u 09,00 sati;
- Turnir u šahu, sala Općine Trnovo 28.07.2004.g. u 09,00 sati;

KULTURNO - OBRAZOVNE AKTIVNOSTI:

- Kulturno - zabavni program na platou ispred zgrade Općine, subota, 24.07.2004.g. u 19,00 sati;
- Prijem delegacija boračkih udruženja kod Općinskog načelnika 29.07.2004.g. u 10,00 sati u Sali Općine Trnovo;
- Obilazak mezarja - grobalja na području Općine Trnovo, petak 30.07.2004.g. poslije džumma namaza;
- Obilježavanje završetka radova na groblju Turovi i završetka asfaltiranja dionice puta za Dejčice 31.07.2004.g. u 10,00 sati;
- Polaganje cvijeća, odavanje počasti šehidima i poginulim borcima na Igmanu (Veliko polje), 31.07.2004.g. u 12,00 sati;

Subota 31.07.2004.g. U 15,00 sati Svečana sjednica Općinskog vijeća Trnovo (podjela općinskih priznanja i referat), u hotelu "Maršal" Babin Do - Bjelašnica.

ORGANIZACIONI ODBOR

Poljoprivreda zauzima jedno od prioriteta mjesta u razvoju privrede općine

U cilju pokretanja privredne aktivnosti na području Općine Trnovo, općina je u saradnji sa Sarajevskom regionalnom razvojnom agencijom (SERDA) i drugim institucijama, organizacijama i pojedincima uradila Strategiju za Općinu Trnovo za period 2003-2006. Da bi se realizovale strateške smjernice identifikovani su projekti koje treba realizovati (ili započeti) u narednom periodu. Neki identifikovani projekti iz oblasti poljoprivrede su realizovani.

U 2003. godini Općinski organ uprave uradio je Program podsticaja za unapređenje poljoprivredne proizvodnje na području Općine Trnovo a Općinsko vijeće donijelo je Odluku o provođenju istog za navedenu godinu. Ovim Programom predviđena je jednokratna isplata za podizanje dugogodišnjih zasada voća, stimulisanje biljne proizvodnje putem plaćanja po proizvodnim površinama kao i podsticaj za stočarstvo. Realizacijom ovog Programa dvadeset četiri poljoprivrednika su stimulirana za ostvarenu proizvodnju za šta je Općina Trnovo iz vlastitih sredstava obezbjedila oko 24.000,00 KM.

U saradnji sa firmom "Klas" Sarajevo šesnaest farmera je na bazi kooperantskih odnosa zasnovalo malinjak sa namjerom da pokrenu proizvodnju jagodastog voća. Firma "Klas" je obezbjedila potrebni repromaterijal na bazi kreditne pozajmice, a poljoprivrednici



osiguravaju odgovarajuću parcelu i rad uz primjenu uputa stručnog lica ove firme. Klas se obavezuje otkupiti proizvedeno jagodasto voće, tako da je ovaj projekat jedan iskorak prelaska poljoprivredne proizvodnje u tržišni vid proizvodnje.



U cilju razvoja poljoprivredne proizvodnje na području Kantona Sarajevo, Ministarstvo za privredu je osiguralo određena finansijska sredstva za finansiranje Projekta "Podsticaj jesenje sadnje voćaka i sjetve krmnih kultura na području općina Kantona Sarajevo".

Realizacijom ovog Projekta na području Općine Trnovo za dvanaest farmera povratnika osigurane su po 150 sadnica voća. Takođe je obavljena i edukacija farmera o uzgoju voća.



Rješavanje imovinsko pravnih odnosa

Imovinsko pravnu oblast reguliše više zakona, što ukazuje na njen značaj, složenost i raznovrsnost.

Osnovne aktivnosti na rješavanju imovinsko pravnih odnosa odnosile su se na realizaciju Urbanističkog projekta "Bjelašnica" I faza, kojim je predviđena izgradnja poslovnih objekata apartmana, hotela, pansiona i objekata javnog sadržaja na lokalitetu Bjelašnice-Babin Do.

Sva proceduralna pitanja koja prethode dodjeli građevinskog zemljišta uz raspisani javni konkurs su uspješno završena i dodijeljeno je 11 lokacija u svrhu izgradnje objekata hotelsko turističkog kompleksa. Za preostale lokacije predstoji raspisivanje javnog konkursa i dodjela lokacija odnosno neizgrađenog građevinskog zemljišta budućim najpovoljnijim ponuđačima.

U toku ove aktivnosti uslijedilo je donošenje novih propisa iz određenih oblast, prvenstveno Zakona o šumama i Zakona o građevinskom zemljištu Federacije Bosne i Hercegovine.

Pored aktivnosti vođene u vezi "Bjelašnice" I

faze uporedo su rješavani imovinsko pravni odnosi na pribavljanju nepokretnosti od vlasnika, umjesto eksproprijacije u korist Općine Trnovo, obuhvaćene trasom puta Gornja Grkarica-Darkovac-Krstac. Imovinsko pravni odnosi su rješavani za izgradnju vodovoda Presjenica i Godinja na kojima je predviđena izgradnja vodo zahvata, rezervoara i polaganja cjevovoda projektovanom trasom.



Pristupilo se rješavanju imovinsko pravnih odnosa za O.Š. "Zaim Kolar" Dejčići radi izgradnje svih predviđenih objekata koji će poslužiti za kvalitetnije školovanje. Planirano je da se za ekspropisano zemljište ranijim vlasnicima isplati naknada u visini od oko 200.000 KM.

Iz geodetskih poslova i katastra nekretnina, poslovi se uspješno obavljaju u zakonom predviđenim rokovima, najznačajniji poslovi su i zadaci koji proizilaze iz Zakona o premjeru i katastru nekretnina. Donešen je Zakon o zemljišnim knjigama, koji nije još našao primjenu u praksi dok se ne stvore određeni uslovi.

Počela realizacija Bjelašnica I faza

U sali Općine Trnovo, uz prisustvo medija, budućih investitora i predstavnika Općine Trnovo, 21.07.2004.godine uručena su rješenja o dodjeli neizgrađenog građevinskog zemljišta u svrhu izgradnje poslovnih objekata apartmana, hotela, apartmana hotela i pansiona i objekata javnog sadržaja, također su uručena rješenja o naknadi troškova već izvedenog uređenja građevinskog zemljišta.

Potpisani su ugovori o realizaciji izgradnje poslovnih objekata na Bjelašnici - Babin Do sa



investitorima Alessandro Luccheti Brčko, "OKI" d.o.o Sarajevo, "Harysco" d.o.o Sarajevo, "Tehel" d.o.o Sarajevo, "Unioninvest" d.d Sarajevo, "Su - ni" d.o.o Sarajevo i Mušinić Munib Sarajevo, čime je otpočela realizacija projekta Bjelašnica I faza.

Budući investitori će za lokaciju, rentu i uređenje građevinskog zemljišta platiti 2.380.000 KM. Rok za završetak radova je od osam mjeseci do dvije godine, što zavisi od veličine objekta.

Za preostale lokacije u sklopu obuhvata Bjelašnica I faza ovih dana biti će raspisan javni konkurs za dodjelu preostalih lokacija.

Prikupljena sredstva od naknada u sklopu realizacije ovog projekta usmjerit će se na asfaltiranje punih pravaca Bijele Vode - Šabići, Gornja Grkarica - Pendičići, Garež - Delijaš, izgradnju visokonaponske mreže Prokresa-Jezero, dogradnju O.Š. "Zaim Kolar" u Dejčićima, rekonstrukciju lokalnih puteva na području općine, deminiranje, eksproprijaciju zemljišta za izgradnju objekata infrastrukture i učesće u zajedničkom finansiranju zajedničkih projekata sa Fondacijom "OdRaz".

U saradnji sa Kantonom i Zavodom za izgradnju Kantona Sarajevo izrađena je projektna dokumentacija uređenja građevinskog zemljišta, raspisan tender i izabran izvođač. Projekat uređenja predviđa izgradnju 35 kV trafostanice na Kabalovu, izgradnju visokonaponske mreže od Kabalova do Babina Dola, te izgradnju šest trafostanica i niskonaponske mreže na lokalitetu Babina dola. Također je predviđena izgradnja vodovodne i kanalizacione mreže, PTT mreže, javne rasvjete, izgradnja nove saobraćajnice sa parking mjestima te kompletne hortikulture samog lokaliteta. Na ovaj način će svi budući investitori dobiti priključke na svojim lokacijama. Izvođač radova je otpočeo sa realizacijom i dužan je da u roku od 90 dana završi sve planirane poslove.

U postupku privatizacije Bosnalijek iz Sarajeva je kupio objekte MOC-a i PRESS centra na čijim temeljima će sagraditi reprezentativni hotel i



apartmane u neposrednoj blizini. Radovi na uklanjanju porušenih objekata su u toku, a do kraja kalendarske godine se očekuje završetak radova na dva apartmana. Ovih dana je završeno prikupljanje ponuda za kupovinu hotela Smuk i Igman. Sredstva prikupljena prodajom ovih objekata će se uložiti u sanaciju staza, vertikalnog transporta, izgradnju zaštitnih ograda, javne rasvjete i razglasa. Planirana je također, nabavka opreme za proizvodnju vještačkog snijega tako da bi na taj način zimsku sezonu sa dva mjeseca produžili na pet mjeseci.



Naredni period treba iskoristiti za izradu provedbeno planske dokumentacije Bjelašnica II faza, odnosno stvoriti pretpostavke za realizaciju i II faze. Urađena je maketa na kojoj je prikazana vizija staza i vertikalnog transporta na lokalitetu Bjelašnice i Igmana, koja predstavlja osnov za buduće planiranje i izgradnju staza i vertikalnog transporta sa svim pratećim sadržajima koji su potrebni za funkcionisanje jednog modernog SKI centra.

Realizacija projekata u 2004.godini

I ove godine izdvojena su značajna sredstva za asfaltiranje putnih pravaca, Šabići - Bijele vode i Grkarica - Dejčići - Pendičići. Sredstvima koja su obezbjeđena od strane Kantonalne direkcije za ceste postavljen je asfalt na oba putna pravca u dužini od po 1500 m.

U narodnom periodu nastaviti će se radovi na asfaltiranju putnih pravaca od Kolijevke prema Bijelim Vodama uključujući i dionicu kroz selo Šabiće od mosta do izlaza iz sela, Grkarice prema Pendičićima s tim što će se radovi izvoditi dijelom od Grkarice prema Dejčićima i dijelom od magistralnog puta M18 do izlaza iz sela Pendičići, a u sklopu raspoloživih sredstava. Ugovor je potpisan za oba navedena pravca i u toku je realizacija.

Za putni pravac Garež - Delijaš - Karovići raspisan je tender za izbor izvođača radova, a isti će se realizovati u dvije faze.

Sanacija lokalnih puteva biće završena do kraja godine, raspisan je tender za izbor izvođača radova, a predviđena je i izgradnja puteva za sela Jelačići, Boljanovići, Čunčići, Zabojsku i Durakoviće, te sanacija ostalih putnih pravaca u zavisnosti od stepena oštećenja.

U saradnji sa Fondacijom «OdRaz», Direkcijom za ceste Kantona Sarajevo, Federalnom direkcijom za ceste i Vladom Japana obezbjeđena su finansijska sredstva za izgradnju i rekonstrukciju mostova na cijelom prostoru Općine Trnovo. Ovim sredstvima do kraja kalendarske godine izgraditi će se most na Željeznici pod Ilovicama, mostovi na Tušiočkom potoku za selo Ozimine (već završen) i Bobovica, most u Presjenici prije naseljenog mjesta Bunovci, most u Šabićima ispod "Škole u prirodi", most na Bukoti koji povezuje Rakitnicu sa Zarijama, mostovi na Katanskom potoku. U



sklopu projekta izgradnje mostova sa Fondacijom «OdRaz» izvršiti će se uređenje korita Rakitnice na dijelu ispod "Škole u prirodi" prema selu Rakitnica i Crne Rijeke na prostoru od postojećeg mosta u Pomenovićima do iznad džamije. Sredstva za uređenje korita obezbjeđena su od strane Ministarstva privrede Kantona Sarajevo.

U saradnji sa Gradom Sarajevo obezbjeđena su sredstva za uređenje dijela korita Rakitnice, raspisan tender za izbor izvođača. Shodno raspoloživim sredstvima ući će se u realizaciju uređenja korita rijeke Željeznice u samoj Godinji.

Zajedničkim projektom dvije općine i dva fonda ("Odras" i Fond za zapošljavanje iz Banja Luke biće završeno asfaltiranje putnih pravaca Tošići - Turovi - Godinja i put za selo Gračanicu. Biće to jedan od prvih projekata takve vrste u BiH.

Na 41. sjednici Općinskog vijeća Trnovo pokrenuta je inicijativa za kandidovanje zajedničkog projekta Kijevo - Presjenica koji obuhvata prostor dvije općine. Prije pokretanja inicijative u



razgovoru sa predstavnicima Fondacije «OdRaz», Fonda za zapošljavanje iz Banja Luke i Općine Trnovo RS data je načelna saglasnost za kandidovanje ovog projekta. Realizacija ovog projekta se očekuje u toku iduće godine.

U saradnji sa Ministarstvom privrede, Ministarstvom prostornog uređenja i zaštite okoliša i J.P. «Slivovi rijeke Save» obezbjeđena su sredstva za izradu projektne dokumentacije za sanaciju deponije smeća Čitluci i sanaciju kolektora u Trnovu. Za deponiju smeća Čitluci obezbjeđena su sredstva za realizaciju, a J.P. «Slivovi rijeke Save» je u pregovorima sa

predstavnicima vlade Japana oko obezbjeđenja finansijskih sredstava za sanacije kolektora u iznosu od oko 1.000.000 KM, jer je isti ušao u tri prioriteta projekta iz ove oblasti.

Za izgradnju objekata za vodosnabdijevanje obezbjeđena su sredstva putem Ministarstva privrede Kantona, Ministarstva prostornog uređenja i zaštite okoliša za vodovod Trebečaj - Brutusi, vodovod Šabići - Lukavac - Brda - Milišići, vodovod Prečani - Rahovići - Umčani - Obla Brda - Moćevići (I faza).

Do kraja godine također trebaju da budu realizovani projekti izgradnje visoko - naponske mreže Prokresa - Jezero te ugradnja rastavljača na postojećim trafostanicama, zatim saniranje visokonaponske mreže od Dejčića do Grepka, izgradnja javne rasvjete u selima: Durakovići, Jelačići, Mošići, Odžak i Bunovci, te proširenje u selima Trebečaj, Gračanica, Dujmovići, Husremovac, Brda, Milišići, Lukavac.

Za obnovu stambenih objekata obezbjeđena finansijska sredstva od Federalnog i Kantonalnog ministarstva za rad, socijalnu politiku, raseljena i izbjegla lica, Ministarstva stambenih poslova, Općine Trnovo i Caritas-a.

Od vjerskih objekata u izgradnji su džamije u Trnovu, Kijevu te sanacija u Pervizima i dogradnja u Dejčićima, a od mesdžida Gračanica, Turovi i Bobovica.

U selima Ozimine, Gaj i Presjenica planirana je izgradnja gasulhana.

Od sportskih objekata sportske plohe u Trnovu i Dejčićima.

U saradnji sa Fondacijom "OdRaz" predviđa se revitalizacija vodenica u Umoljanima i opremanje biblioteke u Delijašima.





DODIJELJENE STIPENDIJE

Sredinom marta 2004. godine, nakon usvajanja Budžeta Općine Trnovo za 2004. godinu, raspisan je konkurs za dodjelu stipendija studentima sa područja Općine Trnovo.

Na konkurs se prijavilo 20 kandidata koji su ispunjavali uslove konkursa. Međutim, zbog ograničenosti iznosa sredstava za ove namjene, svi kandidati nisu mogli biti obuhvaćeni dodjelom stipendija.

Nakon bodovanja kandidata po Pravilniku o stipendiranju studenata koji je utvrdilo Općinsko vijeće, na sjednici održanoj 16. maja 2001. godine sačinjena je lista za dodjelu stipendija u školskoj 2003/2004. godini.

Stipendije su dodijeljene djeci bez oba roditelja: Kadrić (Zejnila) Semir, i Kadrić (Zejnila) Emir kao i studentima: Mulaomerović (Zajka) Sedina, Imamović (Mehmeda) Admira, Omerbegović (Muja) Nizama, Karović (Bećira) Elmedin, Mulaomerović (Šućra) Dženita, Pindžo (Zejnila) Džana, Šehović (Eseda) Mersiha, Mulaomerović (Muja) Dženan, Šehović (Fehima) Adis, Zećo (Ahmeta) Amila, Bajraktarević (Ibrahima) Amela, Ćosić (Amira) Nejra i Mulaosmanović (Omera) Muris.

Upis učenika

U toku školske 2004/2005. godine na području općine Trnovo, u aprilskom upisnom roku u Javnu ustanovu Osnovna škola «Zaim Kolar» Dejčići Trnovo za školsko područje općine Trnovo u prvi razred osnovne škole upisana su 24 učenika od toga 14 dječaka i 10 djevojčica.



Aktivnosti odsjeka za boračku, dječiju i socijalnu zaštitu

U skoro svim mjesnim grobljima na području općine Trnovo ukopani su šehidi poginuli branitelji Bosne i Hercegovine, tako da svako ovo mezarje smatramo šehidsko, uz obavezu

stalnog uređenja, zaštite i ograđivanja istih. Znatan broj ovih mezarja ogradili su mještani, dok je određeni broj ograđen projektom Fonda Kantona Sarajevo za zaštitu i uređenje grobalja šehida. U protekloj godini Fond je na području općine Trnovo poduzeo značajniju aktivnost ograđivanja

šehidskih mezarja, tako što je realizovao ograđivanje tri šehidska mezarja; Govedovići, Delijaš i Turovi, te izgradnju tipizirane kapije na šehidskom mezarju u Šabićima. Da je u pitanju

realizacija projekata većeg obima potvrđuje činjenica da je na mjesnim grobljima u Delijašu i Govedovićima urađena ograda od postojanijeg materijala u dužini od oko 1500 metara, dok je

šehidsko mezarje u Turovima ograđeno kvalitetnom stilizovanom metalnom ogradom. I općina Trnovo je u protekloj godini za ove namjene izdvojila sredstva u iznos od 8.000,00 KM te iste dostavila Fondu kao vid participacije za ograđivanje šehidskih mezarja.



Pitanje zaštite porodice sa djecom, zaštita civilnih žrtava rata i zdravstvena zaštita kroz Zakonska rješenja različito su tretirani u određenim Kantonim a posebno je evidentna

razlika među entitetima. Posljedice su dolazile do izražaja kod realizacije povratka, kada se građanin vrati u prijeratno mjesto prebivališta na područje RS a ima potrebu da ostvari navedena prava. Nadležna općinska Služba je uvidjela navedene probleme povratnika u pogledu ostvarivanja i korištenja prava iz navedenih oblasti, te inicirala održavanje Tematske sjednice općinskog vijeća, koja je i održana 20. januara 2004. godine, uz prisustvo predstavnika viših nivoa vlasti na kojoj su definisani određeni Zaključci te proslijeđeni nadležnim tijelima. Navedena problematika

rješavana je na Skupštini Kantona Sarajevo a što je rezultiralo donošenjem Odluke o privremenom finansiranju prava iz osnova socijalne i zdravstvene zaštite povratnika iz Kantona Sarajevo na područje grada Sarajeva iz 1991. godine koje je Dejtonskim sporazumom pripalo Entitetu Republika Srpska dok se ne usaglase propisi iz navedenih oblasti na nivou entiteta ili ne donesu propisi na nivou Bosne i Hercegovine.

Usvajanjem navedene Odluke te donošenjem odgovarajućih akata biti će riješeni navedeni problemi povratnika na područje RS.

Udruženje Organizacija porodica šehida i poginulih boraca Općine Trnovo

U zadnjih pet godina načinjen je znatan napredak u radu udruženja. Njen uspjeh i postojanost ogleda se u aktivnostima koje su uspješno sprovedene u toku zadnjih godina. Ono što bitno karakteriše ovo udruženje, prvenstveno se odnosi na brigu o maloljetnoj djeci šehida, a isto tako i njihovim roditeljima.

Članovi Upravnog odbora istinski se zalažu da nijedan član porodice ne bude zapostavljen. Iako sa skromnom dotacijom, koju mjesečno prima od Općine Trnovo, ovo

upravno tijelo pronalazi načina da makar skromnom hedijom stavi do znanja da oni koji su ugradili svoje živote u temelje naše lijepe domovine neće, a i ne smiju biti zaboravljeni.

U nizu brojnih aktivnosti koje ova organizacija iz godine u godinu kontinuirano čini mogu se istaći neprekidne aktivnosti vezane za prava porodica šehida i

poginulih boraca Općine Trnovo, obilasci porodica i sagledavanje socijalnog stanja, stambena oblast, odmor i rekreacija djece, supruga i roditelja šehida i poginulih boraca, izgradnja i postavljanje nišana u saradnji sa Fondom Kantona Sarajevo za zaštitu i održavanje grobalja šehida i poginulih boraca, obilježavanje dana šehida, obilježavanje značajnih datuma, podjela dionica djeci šehida poginulih boraca, pomoć socijalno najugroženijim

porodicama šehida i poginulih boraca, školovanje i stipendiranje djece, praćenje donošenja jedinstvenog zakona o pravima boraca Kantona i Federacije BiH.

Sve ove aktivnosti Udruženje sprovodi zahvaljujući zajedničkom djelovanju sa Općinom Trnovo. Naročito treba istaći i dati veliku zahvalnost prvom čovjeku općine g-dinu Ibru Berilu, kao i Predsjedavajućem općinskog vijeća g-dinu Ismetu Imamoviću, koji imaju razumjevanja da odgovore na apel za pomoć. Zahvaljujući takvoj

saradnji, svake godine, za vrijeme vjerskih praznika nastoje se obezbjediti pokloni za djecu i roditelje, hedije za određeni broj članova kojima je to potrebno, kao i za djecu bez oba roditelja.

Dan šehida obilježava se na dostojanstven način, obilaskom mezarja i učenjem hatma dove, te obilježavanjem Dana brigade.



Ono čime se Organizacija može pohvaliti, jeste to da je u saradnji sa Fondom za zaštitu i održavanje grobalja šehida i poginulih boraca Kantona Sarajevo izvršila postavku nišana svim šehidima kako u Federaciji BiH tako i u Republici Srpskoj.

I naredne aktivnosti i djelovanje biće usmjereni na brigu o članstvu i čuvanje uspomene na šehide.

Deminiranje na Općini Trnovo



Izviđanjem terena BH MAC proglasio je 437.000 m² površinom bez vidljivog rizika, a 57.317 m² rizičnom površinom. Za proglašene rizične površine, Dejčići 10.370 m², Godinja 46.000 m² i Presjenica 677 m² izrađeni su projekti za deminiranje, a za površine bez vidljivog rizika, Ilovice most 6.018 m², Jahorina (Košuta) 6.513 m², Ski lift Kotlovi vrh Bjelašnice 64.010 m², Karovići - Čunčići (niskonaponska mreža) 7.855 m², Pendičići Barice (niskonaponska mreža) 10.620 m², "Bjelašnica I faza" (projekti od 1 do 11) 235.810 m² dostavljena su stručna mišljenja BH MAC-a.

Deminiranje u selu Dejčići završeno je 12.07.2004.godine, površine 10.370 m², a u toku je deminiranje u selu Godinja, površine 46.000 m², a završetak radova planiran je početkom avgusta 2004.godine. na deminiranju angažovana je kompanija "MECHEM COUTERMINING". Sredstva za deminiranje u iznosu oko 200.000,00 KM obezbjeđena su preko International Trust

Fond (ITF) uz veliku podršku BH MAC-a.

Svjesnost o postojanju mina

U cilju zaštite ljudi i materijalnih dobara, a prvenstveno na zaštiti od ubojnih sredstava, kontinuirano se provode mjere zaštite. U saradnji sa osnovnom školom "Zaim Kolar", Crvenim križom i jedinicama SFOR-a i ove godine realizovan je Program "Svjesnost o postojanju mina". Cilj Programa je, razvijanje svijesti u svim strukturama stanovništva o opasnostima koja prijete od zaostalih ubojnih sredstava.

Tokom cijele godine građani mogu predati zaostala ubojna sredstva (naoružanje, municiju i druga ubojna i borbena sredstva) ili prijaviti na

kom se mjestu ili lokaciji nalaze zaostala sredstva. U ovoj godini je predato i pronađeno preko 1000 komada municije različitih kalibara te izvršeno uništavanje 62 granate.



Uz izuzetno dobru saradnju sa BH MAC-om izvršeno je "hitno" obilježavanje rizičnih površina koje su stvarale najvišu prijetnju za stanovnike i izletnike, a to su područja: Godinje, Godinjske bare, Runjevica, Dugi do, Ostojići, Umčani, Obla brda, Prečani, Prečko polje, Presjenica, Klokočevica, Babin do Štini do i Babin do Bijele vode. Aktivnosti na "hitnom" obilježavanju nastavit će se i dalje do konačnog deminiranja. Provođenjem svih ovih mjera do sada nije bilo povrijeđenih ili smrtno stradalih na području općine.

Pripreme za općinske izbore 2004

U skladu sa Izbornim zakonom BiH, Izborna komisija Bosne i Hercegovine je raspisala i zakazala općinske izbore za dan 02.10.2004. godine. Postupajući po Odluci Izborne komisije BiH, Općinska izborna komisija je odmah po raspisivanju izbora počela sa aktivnostima na pripremi i stvaranju uslova za nesmetano, normalno i zakonito održavanje općinskih izbora. Stim u vezi Općinska izborna komisija Trnovo (u daljem tekstu OIK) je usvojila Plan rada OIK-a za 2004.godinu, te Predračun-budžet potrebnih sredstava za pripremu i sprovođenje općinskih izbora. I Plan rada i budžet je razmatralo i usvojilo Općinsko vijeće Trnovo na svojim redovnim sjednicama.

U skladu sa usvojenim Planom rada, upustvima i instrukcijama IK BiH, te rokovima iz Izbornog zakona BiH, OIK je počeo sa izvršavanjem poslova i realizacijom zadataka na pripremi i sprovođenju općinskih izbora. Ovdje treba napomenuti da je određeno da ove izbore sprovode domaći organi potpuno samostalno, a da međunarodna zajednica samo nadgleda izbore, bez bilo kakvog miješanja u izborni proces.

Takođe, treba istaći da se dostava i provjera kandidata vrši direktno preko općinskih izbornih komisija. Isto tako prvi put na ovim izborima će se općinski načelnici birati neposredno od strane samih birača, a ne kao do sada da Općinskog načelnika bira Općinsko vijeće.

Prema rokovima iz Plana rada OIK-a, sačinjen je Plan rada Općinskog centra za registraciju. Centar za registraciju je smješten u prostorijama matične službe općine Trnovo, a same poslove registracije i preregistracije birača vrši radnik raspoređen na poslove matične službe. U cilju bolje obaviještenosti građana o načinu, uslovima, vremenu i mjestu registracije OIK je putem plakata vidno istaknutih na više mjesta u svim MZ i naseljenim mjestima obavijestio građane gdje, kako, kada i pod kojim uslovima mogu se registrirati za predstojeće izbore.

Obzirom da građani nisu iskazivali veliki interes za registraciju. OIK je u saradnji sa općinskim vlastima sačinio i realizirao Operativni plan rada Mobilnog centra za registraciju. Po tom planu radnik osposobljen i zadužen za registraciju posjetio je sve mjesne zajednice i vršio registraciju građana u ovim mjesnim zajednicama. U svakoj mjesnoj zajednici Mobilni tim je boravio od 3-5-dana i svi građani su imali dovoljno vremena da se registruju, posebno imajući u vidu da je IK BiH svojim Upustvom omogućila da se registracija može vršiti prikupljanjem identifikacionih dokumenta onih građana koji nisu mogli lično doći u Centar za registraciju. O rasporedu rada Mobilnog tima građani su upoznati putema plakata distribuiranih u sva naseljena mjesta preko sekretara MZ. U cilju većeg odziva građana na registraciju OIK je takođe sačinio Plan izlaganja privremenih biračkih spiskova građana. Birački spiskovi su bili izloženi u svim naseljenim mjestima, mjesnim zajednicama, biračkim mjestima i Centru za registraciju

birača u vremenu od 05.05. 2004.godine do 04.06. 2004.godine.

Sve naprijed navedene aktivnosti OIK-a i drugih organa dale su dobre rezultate, jer je u prethodnom periodu po podacima Centra za registraciju od početka 2004.godine do 17.06.2004.godine ukupno registrirano 485.birača, i to, 102. nova birača i 383. preregistrirana birača. Sa ovim smatramo da Trnovo ima oko 1700 birača (lično glasanje i glasanje u odsustvu). Napominjemo da je Odlukom IK BiH 17.06.2004.godine zadnji rok za registraciju birača za općinske izbore.

U cilju bolje pripreme OIK je preliminarno odredio biračka mjesta za predstojeće izbore te naseljena mjesta koja pripadaju pojedinim biračkim mjestima. Preliminarno su određena slijedeća biračka mjesta: 001 Dejčići, 002 Šabići, 003 Tušila, 004 Trebečaj i 005 Delijaš. Birački odbori za svako biračko mjesto još nisu određeni (prema Planu rada odbori će se određivati krajem avgusta 2004.godine), ali će OIK u saradnji sa političkim partijama i općinskim načelnikom blagovremeno izvršiti imenovanje i obuku biračkih odbora. Takođe političke stranke će za izbore predložiti svoje posmatračice i isti će od OIK dobiti propisane akreditacije ako budu ispunjavali zakonske uslove.

Kao što je naprijed već spomenuto na ovim izborima se općinski načelnik bira neposredno voljom birača, a takođe prijem i provjera kandidatskih lista se prvi put vrši preko općinskih izbornih komisija. Sve političke partije su putem medija i na druge odgovarajuće načine obaviještene o načinu sastavljanja i rokovima dostave lista kandidata za općinske izbore. Za općinske izbore sve političke partije su bile dužne OIK -u dostaviti uredno pupunjene zbirne liste kandidata za općinsko vijeće i kandidatske obrasce za svakog kandidata do 29.06.2004.godine, a OIK je dužan od 29.06. do 09.07.2004.godine iste provjeriti, unijeti podatke, sačiniti i zapisnik i ako je sve u redu dostaviti IK BiH.

Do 29.06.2004.godine za općinske izbore su se prijavile četiri političke partije i to: SDA, S BiH, SDP i Stranka penzionera-umirovljenika.

SDA je za nosioca liste predložila Godinjak Edhema, a za načelnika je predložila Durmo Zejnila iz Šabanaca.

S BiH je nosioca liste predložila Hamzić Selimane-kadašnjeg komandanta 1.Bošnjačke brigade, a za načelnika je predložila Ramić Miralem sa Trebečaja.

SDP je za nosioca liste predložila Torlak Muniba iz Dujmovići, a za načelnika nisu predložili svog kandidata.

Stranka penzionera-umirovljenika se prvi put pojavljuje samostalno i predložila je listu sa dva kandidata. Nosilac liste je Bota Mujo iz Dejčića i nisu predložili kandidata za načelnika.

Napominjemo da općinsko vijeće broji 15. vijećnika, da će u OV ući oni sa najviše glasova i da će za načelnika biti izabran kandidat sa najviše dobijenih glasova.

Prilikom prijema i kontrole kandidatskih lista OIK je utvrdio da su sve liste sačinjen u skladu sa zakonom, predate u zakonskom roku, pa ih je kao takve prosljedio Izbornoj komisiji BiH.

Sportsko ribolovno društvo Trnovo



Udruženje Sportsko ribolovno društvo Trnovo je osnovano sa ciljem i zadatkom popularizacije sportskog ribolova kao značajnog vida odmora i rekreacije i okupljanja građana u ovaj oblik sporta, unaprijeđenje ribljeg fonda i mjere za njegovu zaštitu, zaštitu ribolovnih voda od zagađivanja putem preduzimanja preventivnih mjera.

Udruženje je formirano sedamdesetih godina prošlog vijeka, a svoj rad u ovom obliku obnovilo je 1998. godine s ciljem zaštite i popularizacije ovog sporta i čiste sredine koji ima Općina.

Udruženje čine najvećim dijelom ribolovci sa područja Općine Trnovo, ali u posljednje vrijeme je sve veći broj članova iz drugih općina Kantona Sarajevo.

U poslijeratnom periodu Udruženje je izvršilo poribljavanje voda općine Trnovo sa oko 40.000 kom mlađi potočne pastrmke.

Po prvi put je organizovana jaka i kvalitetna čuvarska služba koja broji 10 čuvara ribljeg fonda, te je s tim brojem izvršeno pokrivanje svih ribolovnih voda Općine Trnovo sa čuvarskom službom i mogućnost krivolova je svedena na najmanju moguću mjeru. Ovom doprinosi i saradnja sa Policijskim Odjelom Trnovo koji ovom društvu pruža pomoć u sprečavanju krivolova na ribolovnim vodama Općine Trnovo.

Ministarstvu prostornog uređenja i zaštite okoliša Kantona Sarajevo apliciran je projekat čišćenja rijeke Željeznice sa ciljem čišćenja korita rijeke Željeznice i indirektnog zainteresiranja mladih za ovaj vid sporta, te edukacija učenika osnovne škole o očuvanju prirodne okoline i o bogatstvu koje ima naša Općina. Za realizaciju navedenog projekta dobijeno je 2.000 KM.



U okviru ovog projekta u Školi u prirodi u Šabićima je izvršena edukacija učenika OŠ "Zaim Kolar" na temu "Ekologija, zaštita i očuvanje prirodne okoline". Obezbjedeno je predavanje predavača gosp. Šišić Muhameda, takođe učenici su bili u prilici vidjeti izložbu slika rijeke Rakitnice, prirodnih ljepota Općine i cjelokupne teritorije BiH, te dokumentarni film o ljepotama voda općine Trnovo i čišćenju rijeke Rakinice.

U narednom periodu projekat će biti završen u potpunosti, gdje će aktivno učešće uzeti i KJKP Rad Sarajevo, RJ Trnovo. Pored čišćenja korita rijeke Željeznice obezbjedit će se i postavljanje korpa za odlaganje smeća, tabli sa natpisima o zaštiti okoline i zabrani odlaganja smeća i brojevima Eko telefona, te nekoliko klupa duž obala jezera Bogatići.

Plan poribljavanja

Na sastancima sa predstavnicima Ministarstva privrede Kantona Sarajevo je dogovoreno poribljavanje voda Općine Trnovo. Ovim aktivnostima će se obezbjediti poribljavanje oko 25.000 kom. mlađi pastrmke i oko 3.000 komada lipljena. Aktivnosti oko pomenutog poribljavanja su pri samom završetku, te se svakoga dana očekuje da u saradnji sa Centrom za ihtiologiju i ribarstvo izvrši poribljavanje ribolovnih voda općine Trnovo.

Sa Elektroprivredom BiH je uspostavljena saradnja koja će rezultirati u participiranju istih sa oko 10.000-15.000 kom izlovne pastrmke godišnje. Saradnja je postignuta i za naredne godine, tj. isti će za svaku narednu godinu učestvovati u participiranju poribljavanja voda općine Trnovo.

Sa okončanjem navedenih aktivnosti Plan poribljavanja voda općina Trnovo, shodno Ribarstveno-gospodarska osnova Kantona Sarajevo će biti u potpunosti realizovan.

Isto tako u toku su pregovori sa preduzećem ŽGP Sarajevo koje izvodi radove na izgradnji mosta na rijeci Željeznici oko nadoknade štete po riblji fond koju su isti prouzrokovali izgradnjom mosta. Obezbjedena sredstva će biti usmjerena za poribljavanje u 2005. godini.

U vezi sa navedenim može se konstatovati da je SRD Trnovo u toku 2004. godine učinio znatne napore na očuvanju i unaprijeđenju ribljeg fonda, što je prvenstveno uticalo na svijest sportskih ribolovaca i u ovoj godini je pored starih članova učlanjen i 41 novi član ovog uduženja i 10 omladinaca za koje je SRD Trnovo obezbjedio besplatnu članarinu s ciljem približavanja ove vrste sporta djeci i omladini i udaljavanje istih sa ulice.



BILTEN

OPĆINE TRNOVO

Izdavač Općina Trnovo juli 2004. godine
WEB Općine Trnovo www.trnovo.org
Štampa GIK OKO Sarajevo